

## S'ISPERA DE S'ANIMA

Custa notte  
mentre sa sofferenzia  
brìgat chi su sonnu  
e sa luna ridet'a sos olostrios,  
su silenziu eternu de s'infinitu  
m'azzunghet penas a s'anima.

In pedes d'unu cercu seculare,  
ammentenne profumos anticorios,  
presoneri e sonnios  
s'anima non resesso a cossolare...

M'est craru s'arcanu  
de essere unu nudda infusu de ignoranzia...

Eppuru,  
in s'intimu meu  
m'intenno giamare  
a noa connoschenzia  
in d'una vida senza fine.

Custa notte,  
cheria leghere cosas mai iscritas,  
segretos mai ischidos  
cheria intennere cosas mai nadas.

Sa mea est'un'idea 'e rinnegu  
po limites terrenos,  
est una vocascione forte  
a s'eternidade...

Cheria essere sa gùttia  
c'arrivat'a mare  
de no siccare mai,  
de fagher parte u'aberit naschente  
s'unda dulce  
cun impetos e brios  
"ue s'aba murmutat da S'ALTU"